

**ZAKON
O IZMJENAMA I DOPUNAMA ZAKONA O BUDŽETIMA U
FEDERACIJI BOSNE I HERCEGOVINE**

**ZAKON
O IZMJENAMA I DOPUNAMA ZAKONA O BUDŽETIMA U FEDERACIJI BOSNE I
HERCEGOVINE**

Član 1.

U Zakonu o budžetima u Federaciji Bosne i Hercegovine ("Službene novine Federacije BiH", br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25a/22 i 7/25), u članu 2. stavu (1) tač. 55. i 58. se mijenjaju i glase:

"55. vanbudžetski korisnici u smislu ovog zakona su privredna društva, organizacije, ustanove ili druga pravna lica u kojima Federacija, kantoni, gradovi ili općine imaju odlučujući uticaj na upravljanje i koje se prema pravilima statističke metodologije Evropske unije razvrstava u sektor opće države, a nisu budžetski korisnici.

58. zaduživanje je stvaranje finansijske obaveze po osnovu ugovora o kreditu, zajmu, finansijskom lizingu i izdavanju vrijednosnih papira."

Član 2.

U članu 41. stavu (1) alineja 5. riječ: „fondova“ zamjenjuje se riječju: „korisnika“.

Član 3.

U članu 52. stavu (2) riječ: „fonda“ zamjenjuje se riječju: „korisnika“.

Član 4.

U članu 60. stav (1) mijenja se i glasi:

"(1) Sredstva tekuće rezerve, planirana u budžetu, koriste se za nepredviđene namjene, za koje u budžetu nisu planirana sredstva ili za namjene za koje se u toku godine utvrdi da za njih nisu planirana dovoljna sredstva, jer ih pri planiranju budžeta nije bilo moguće predvidjeti te u drugim slučajevima kada o tome odluči Vlada."

Član 5.

U članu 67. stav (1) mijenja se i glasi:

"(1) Federacija, kanton, grad i općina mogu se zadužiti i izdati garancije u svrhe, na način, pod uslovima i u obimu propisanim Zakonom o dugu, zaduživanju i garancijama u Federaciji Bosne i Hercegovine."

Iza stava (1) dodaje se novi stav (2), koji glasi:

"(2) Vanbudžetski korisnici mogu se zadužiti pod uslovima propisanim Zakonom o dugu, zaduživanju i garancijama u Federaciji Bosne i Hercegovine, u skladu s propisima koji uređuju njihovo poslovanje."

Dosadašnji stav (4) postaje stav (5) te se mijenja i glasi:

"(5) Odredbe st. (3) i (4) ovog člana shodno se primjenjuju i na kantone, gradove, općine i vanbudžetske korisnike."

Dosadašnji st. (2), (3) i (4) postaju st. (3), (4) i (5).

Član 6.

Član 68. mijenja se i glasi:

“Član 68.

(1) Zakonom o izvršavanju budžeta Federacije određuju se:

- visina novog zaduživanja Federacije kao i obaveze iz osnova tekućih otplata duga Federacije;
- ukupna visina zaduženja svih vanbudžetskih korisnika Federacije, kao i ukupan iznos otplata glavnice njihovog duga.

(2) Godišnji iznos zaduženja svih vanbudžetskih korisnika Federacije ne može biti veći od ukupne visine zaduženja utvrđene Zakonom o izvršavanju budžeta Federacije.”

Član 7.

U članu 69. stav (2) mijenja se i glasi:

“(2) Kratkoročni dug nastao radi finansiranja budžetskog deficita proizašlog iz gotovinskog toka mora se otplatiti u fiskalnoj godini u kojoj je zaduženje i nastalo te ni u kom vremenskom periodu u toku te fiskalne godine ne smije preći 15% redovnih prihoda budžeta ostvarenih u prethodnoj fiskalnoj godini.”

Iza stava (2) dodaje se novi stav (3) koji glasi:

“(3) Kratkoročni dug nastao radi finansiranja budžetskog deficita proizašlog iz gotovinskog toka neće se smatrati neizmirenim i neće ulaziti u svrhe utvrđivanja ograničenja za zaduživanje i izdavanje garancija.”

Član 8.

U članu 76. stavu (4) iza riječi: „rashodi“ dodaju se riječi: „i izdaci“.

Član 9.

Ovaj zakon stupa na snagu narednog dana od dana objavljivanja u “Službenim novinama Federacije BiH”.

**PREDSJEDAVALJUĆI
PREDSTAVNIČKOG DOMA
PARLAMENTA FEDERACIJE BiH**

Dragan Mioković

**PREDSJEDAVALJUĆI
DOMA NARODA
PARLAMENTA FEDERACIJE BiH**

Tomislav Martinović